

## UN kaj Unesko ĉe la 108-a Universala Kongreso de Esperanto

Torino, Italio, 29 julio – 5 aŭgusto 2023

Internaciaj aferoj kaj la laboro de UN kaj Unesko ricevis iom multan atenton en la kongreso – en la Movada Foiro en la unua tago de la kongreso, en unu fermita kaj unu publika kunveno pri UN/Unesko, kaj ankaŭ en la kongresa rezolucio fine de la semajno. La kongresa temo, "Enmigrado – kunfluo de homaj valoroj", estis escepte bone organizita ĉi-jare, kaj rezultigis utilan kaj utiligeblan kongresan rezolucion.

La Movada Foiro okazis en la korto antaŭ la kongresejo. UN/Unesko dividis tablon kun CED kaj ESF. Ni pretigis mallongigitan version de nia plej lasta (julia-aŭgusta) informilo, kies cent ekzempleroj rapide elĉerpiĝis. Ankaŭ disponeblis (1) la ampleksa raporto pri UN kaj Unesko verkita cele al la Estrara Raporto de UEA, (2) raporto pri la kontribuo de la Internacia Esperanto-Koruso al la Internacia Tago de Paco kunorganizita de la LigKomitato de NROj ĉe Unesko (septembro 2022) kaj (3) kelkaj ekzempleroj de ĝisdatigita historio de Unesko kaj Esperanto. Trideko da ekzempleroj de la *Gvidilo al la 17 Celoj por Daŭripova Evoluigo* estis disdonitaj al tiuj kiuj aparte esprimis interesiĝon pri tiu temo.

Fermita kunsido por reprezentantoj de UEA ĉe UN kaj Unesko okazis en mardo kaj publika kunsido pri UN kaj Unesko en ĵaŭdo. Prezidis Humphrey Tonkin kunlabore kun estrarano de UEA François Lo Jacomo. La fermita kunsido, limigita al aktivuloj, montriĝis aparte utila. Ĉeestis, inter aliaj, Alfred Heiligenbrunner (Vieno), Norina Schantl (Vieno), Cesco Reale (Ĝenevo), Mireille Grosjean (Ĝenevo), Alain Favre (Ĝenevo), Nicole Margot (Ĝenevo), Humphrey Tonkin (Novjorko), François Lo Jacomo (Parizo), Didier Loison (Parizo). Ĉeestis ankaŭ la kunredaktoro de la *Gvidilo al la 17 Celoj*, Rakoen Maertens, kaj deko da aliaj aktivuloj.

Cesco Reale sugestis, ke ni antaŭvidu en 2023-24 regulajn Zoom-kunsidojn, eventuale ĉiun duan monaton dum semajnfino. La unua estis fiksita por **la 23a de septembro (sabato) je la 9-a horo en Novjorko, la 15-a en Parizo, Ĝenevo kaj Vieno**. Humphrey disanoncos kaj organizos la kunsidojn. Tia regula kontakto faciligos kunordigon de agado kaj pli sisteman laboron.

Diskutataj estis i.a. ĝisdatigo de la gvidlibro pri la Celoj, la retejo esperantoporun.org, la Facebook-paĝo UN kaj Internaciaj Aferoj kaj aliaj temoj. Humphrey Tonkin aparte raportis pri la lastatempa kunsido kun la Prezidanto de la Ĝenerala Asembleo pri la lingva politiko de Unuiĝintaj Nacioj – kunsido esence reĝisorata de UEA kaj aparte atentinda pro tio, ke interpretado estis liverita ne nur en la ses lingvoj de UN sed ankaŭ en Esperanto, dank' al la impona kunlaboro de kelkaj elstare lertaj kaj inventemaj kolegoj-esperantistoj.

Ĉiuj kunvenejoj en la kongresejo estis grandaj prelegejoj ne aparte taŭgaj por malgrandskalaj kunsidoj. La publika kunsido pri UN kaj Unesko allogis 20-30 kongresanojn, kiuj iom perdiĝis en la granda halo. La kunsido konsistis esence el raportoj pri la agado kaj demandoj de la publiko, inter kiuj estis pluraj homoj kiuj anoncis sian pretecon kunlabori en la agado. Menciitaj estis la evoluoj en Novjorko, la kunlaboro en aliaj UN-centroj, laboro por la 17 Celoj – kaj la graveco ekspluati la fakton, ke la venontjara kongreso okazos en Afriko.

Ni interalie lanĉis la ideon, ke okaze de tiu ĉi UK en Afriko, UEA ekhavu reprezentanton ankaŭ en Najrobio, kvina sidejo de UN. Ni menciis nian oficejon en Novjorko, necesan kunlaboron kun TEJO, eblecon, ke UEA iĝu en asociaj rilatoj kun Unesko, kun avantaĝoj kompare kun la nunaj konsultaj rilatoj, kaj du gravajn celojn: la Tago de Esperanto kaj Esperanto kiel nemateria kultura heredaĵo de la homaro.

Tra la tuta kongresa semajno okazis kunvenoj pri la kongresa temo, lerte reĝisorata de Thomas Bormann. La finaj rezolucio kaj raporto enhavas utilajn konkludojn, uzeblajn en la kontaktoj kun UN kaj Unesko. La rezolucio estis jam sendita al UN, pere de la Branĉo NROj de Ekosok, en Esperanto kaj la angla.

**H.T. kaj F.L.J.**

17 aŭgusto 2023